

南北史合注

欽定四庫全書

南北史合注卷八十七

明 李清 撰

魏本紀第一

北史一

魏之先出自黃帝軒轅氏黃帝子曰昌意昌意少子受封北國有大鮮卑山因以為號其後世為君長統幽都之北廣漠之野畜牧遷徙射獵為業淳朴簡易不為文字刻木結繩而已時事遠近人相傳授如史官紀錄黃

帝以土德王北俗謂土為拓謂后為跋故以為氏其裔
始均仕堯時逐女魃於弱水北人賴其勲舜命為田祖
歷三代至秦漢獫狁獯狁山戎匈奴之屬累代作害中
州而始均之裔不交南夏是以載籍無聞積六七十代
至諱毛者立

魏收魏書曰毛聰明將畧遠近所推

統國三十六大姓九十九威振北方道武即位追尊成
皇帝追尊自毛始毛俎貸立貸俎觀立觀俎樓立樓俎

越立越殂推寅立推寅南遷大澤方千餘里厥土昏冥
沮洳謀更南徙未行而殂利立利殂俊立侯殂肆立肆
殂機立機殂蓋立蓋殂僧立僧殂隣立時有神人言此
土荒遐宜徙建都邑隣年老乃以位授子喆汾命南移
山谷高深九難八阻欲止有神獸形似馬聲類牛導引
歷年乃出始居匈奴故地其遷移策畧多出推寅隣二
主故時人並號推寅蓋俗云鑽研之義初喆汾嘗田於
山澤歟見輜輶自天下既至見美婦人自稱天女受命

相偶旦日請還期年周時復會於此言終而別去如風
雨及暮詰汾至先田處果見天女以所生授之曰此君
之子當世為帝王語訖而去即力微也故時人諺曰詰
汾無婦家力微無舅家

愚按詰汾力微上俱有皇帝二字時未稱皇帝安得
有此稱去之

詰汾殂力微立其後道武稱帝追尊貸曰節皇帝觀曰
莊皇帝樓曰明皇帝越曰安皇帝推寅曰宣皇帝利曰

景皇帝侯曰元皇帝肆曰和皇帝機曰定皇帝蓋曰僖
皇帝僧曰威皇帝隣曰獻皇帝詰汾曰聖武皇帝至力
微始稱祖始祖神元皇帝諱力微元年歲在庚子先是
西部內侵依於沒鹿迴部大人賓賓神元有雄傑之度
後與賓攻西部賓軍敗失馬步走神元使以所乘駿馬
給之賓歸求馬主神元隱而不言賓後知大驚將分國
之半奉神元不受乃進其愛女賓猶思報恩乃從神元
所欲徙所部北居長川積數年舊部人咸來歸附及賓

臨終戒其二子使謹奉神元其子不從乃陰謀逆神元
殺之盡并其衆諸部大人悉服控弦之士二十餘萬三
十九年遷于定襄之盛樂四月祭天諸部君長皆來助
祭唯白部大人觀望不至徵而徇之遠近肅然神元乃
告諸大人與晉和親

魏書載神元言曰我觀前世匈奴冒頓輩貪財掠邊
民雖有所得而死傷不足相補更招寇仇百姓塗炭
非長計也

四十二年遣子沙漠汗如晉且觀風土是歲曹魏景元二年也沙漠汗以國長子留洛陽

魏書曰始祖與鄰交好篤信推誠不為倚伏以邀一時之利寬裕任真遐邇歸附

後以父春秋已高求歸晉武帝具禮護送五十六年沙漠汗復如晉其冬還國晉征北將軍衛瓘以沙漠汗雄異恐為後患請留不遣復請以金錦賂國大人令致間隙

魏書曰國之執事及外部大人皆受重貨

五十八年方遣還神元使諸部大人詣陰館迎之酒酣
沙漠汗仰視飛鳥飛九落之時國俗無彈衆大驚相謂
曰太子被服南夏兼奇術絕人若繼國統變易舊俗吾
等必不得志乃謀危害沙漠汗汗竝先馳還白太子引空
弓而落飛鳥似得晉人異法自沙漠汗在晉後諸子愛
寵神元頗有所惑及聞諸大人請因曰當便除之於是
諸大人馳諸塞南矯害沙漠汗

魏書曰帝身長八尺英姿瓌偉在晉日朝士大夫多與親善雅為人物歸仰

其年神元不豫烏丸王庫賢親近任勢先受瓊貨欲沮動諸部因於庭中礪鉞斧曰上恨汝曹讒殺太子欲盡收諸大人長子殺之大人皆信各各散走神元尋殂凡享國五十八年年一百四歲其後道武稱帝上廟號及謚子悉鹿立時諸部離叛立九年殂弟綽立七年殂魏書曰帝雄武有智畧威德復舉

沙漠汗少子弗立政崇寬簡百姓懷服一年殂神元子
祿官立九年分國為三部一居上谷北濡源西東接宇
文部自統之一居代郡之參合陂北使沙漠汗長子猗
屯統之一居定襄之盛樂故城使猗屯弟猗盧統之自
神元以來與晉和好

魏書曰百姓乂安財畜殷實控弦騎士四十餘萬
是歲猗盧始出并州遷雜胡北徙雲中五原朔方又西
渡河擊匈奴烏丸諸部自杏城以北八十里迄長城原

夾道立碣與晉分界二年葬沙漠汗及妃封氏初弗政
欲改葬弗果而卒至是述成前意三年猗屯度漠北巡
因西畧諸國凡積五歲諸部降附者三十餘國猗屯英
傑魁岸馬不能勝常乘安車駕大牛牛角容一石帝曾
中蠱嘔吐之地仍生榆參合陂土無榆故時人異之十
年匈奴別種劉淵

愚按唐高祖名淵故唐人避之書淵為元海今正之
餘倣此

反晉於離石自號漢王并州刺史司馬騰來請師猗屯
與猗盧大舉以助之大破淵衆於西河上黨猗屯與騰
盟于汾東而還乃使輔相衛雄段繁於參合陂西累石
為亭樹碑以記行焉十一年

魏書曰淵攻司馬騰請師帝以輕騎數千救之斬淵
將綦母豚淵南走蒲子

晉假猗屯大單于金印紫綬是歲猗屯卒猗屯統部凡
十一年後定襄侯衛操樹碑于大邦城以頌功德子普

根代立十三年祿官殂猗盧總攝三部為一統猗盧天
姿英峙勇畧過人元年劉淵僭帝號自稱大漢三年晉
并州刺史劉琨遣子導為質乞師

魏書曰白部大人叛入西河鐵弗劉虎舉衆於鴈門
以應之攻琨新興鴈門

猗盧使弟子鬱律助琨破白部大人次攻鐵弗劉虎
魏書曰屠其營落虎收餘燼西走渡河竄居朔方
愚按唐太祖名虎故唐人諱虎為武今正之餘倣此

晉懷帝進猗盧大單于封代公公以封邑去國縣遠從
琨求句注陁北地琨乃徙馬邑陰館樓煩繁峙崞五縣
人於陁南更立城邑盡獻其地東接代郡西連西河朔
方數百里公徙十萬家充之

魏書曰劉琨又遣使請救洛陽帝遣騎二萬助之東
海王司馬越辭以洛陽飢乃還是年漢劉淵卒子聰
僭立又載四年劉琨牙門將邪延據新興叛招入聰
公遣軍討之聰退走五年劉琨遣使迄師討聰及石

勒公許之會聽遣其子粲襲晉陽害琨父母據其城
琨來告難公遣長子六脩猗屯子普根及衛雄范班
姬澹等為前鋒公躬統大衆二十萬後繼粲懼焚輜
重突圍走縱騎追之斬其將劉儒劉豐簡令張平邢
延伏尸數百里琨來拜謝固請進軍公曰吾不早來
致卿父母見害誠以相愧今卿已復州境然吾遠來
士馬疲弊且待再舉賊奚可盡乎饋琨馬牛羊各千
餘車百乘又留精銳戍之而還是年晉雍州刺史賈

京兆太守韋鼎以晉懷帝為劉聰所執共立懷帝兄
子秦王業為太子於長安

六年城盛樂以為北都脩故平城以為南都公登平城
西山觀望地勢乃更南百里於湟水之陽黃瓜堆築新
平城晉人謂之小平城使子六脩鎮之統領南部八年
晉愍帝進公為代王置官屬食代常山二郡先是國俗
寬簡至是明刑峻法諸部人多以違命得罪凡後期者
皆舉部僇之或室家相携悉赴死所人問何之曰當就

誅其威嚴若此九年王召六脩不至怒討之失利遂為
六脩所弑普根先守外境聞難來攻六脩滅之普根立
月餘卒普根子始生猗屯妃立之又卒後道武稱帝追
尊沙漠汗為文皇帝悉鹿為章皇帝綽為平皇帝弗為
思皇帝祿官為昭皇帝猗屯為桓皇帝猗廬為穆皇帝
至鬱律復稱祖太祖平文皇帝諱鬱律弗子資質雄壯
甚有威畧元年歲在丁丑二年劉孝據朔方來侵西部
王大破之西兼烏孫故地東吞烏吉以西控弦士馬將

百萬是歲晉愍帝為漢劉聰所弒元帝即位江南劉曜
僭帝位改號趙王聞晉愍遇害顧謂大臣曰今中原無
主天其資我乎曜遣使請和王不納三年石勒自稱趙
王是為後趙遣使請和願為兄弟斬其使絕之五年晉
元帝遣使韓暢加崇爵服王絕之講武有平南夏志猗
近妃以王得衆心恐不利己子遂弒之

本史曰桓后惟氏生三子長普根次惠帝次煬帝性
猛忌平文之崩后所為也

大人死者數十人後道武稱帝上廟號及謚倚苞中子
賀儔立以五年為元年王未親政事太后臨朝遣使與
石勒通和時謂女國使四年王始臨朝以諸部人情未
悉款順乃築城于東木根山徙都之五年殂弟紇那立
以五年為元年三年後趙石勒遣石虎寇邊部王禦之
不利遷於大寧時平文長子翳槐居於舅賀蘭部王遣
使求之賀蘭部帥藹頭擁護不遣王怒召宇文部并力
擊藹頭宇文衆敗王還大寧五年王出居宇文部賀蘭

及諸部大人立翳槐以五年為元年後趙石勒遣使求
和王遣弟什翼犍如襄國徙者五千餘家七年藹頭不
脩臣職召戮之國人復貳紇那自宇文部還入諸部大
人復奉之以七年為後元年時翳槐出居于鄴三年石
虎納翳槐于大寧國人六千餘家部落叛紇那出居於
慕容部翳槐復立以三年為後元年城盛樂城在故城
東南十里一年殂其後太祖即位追尊賀正為惠皇帝
紇那為煬皇帝翳槐為烈皇帝而昭成立高祖昭成皇

帝諱什翼犍

唐書曰昭成後有元行冲以系出拓跋撰魏典三十篇內言曹魏時河西柳谷出石有牛繼馬之象魏收作魏書謂晉元帝牛氏子冒司馬姓以著石符非也時成名捷繼晉受命獨此可當之愚按行冲言近鑿姑錄以志奇

平文次子生而奇偉寬仁大度身長八尺隆準龍顏立髮委地卧則乳垂至席翳槐臨殂顧命迎高祖曰立此

人則社稷安故高祖弟孤自詣鄴奉迎與高祖俱還十一月王即位于繁峙北時年十九稱建國元年二年春始置百官分掌衆職東自穢貊西及破落那莫不款附五月朝諸大人于參合陂議定都溫源川連日不決從太后計而止娉燕慕容晃妹為王后三年春移都雲中之盛樂宮四年築盛樂城於故城南八里王后慕容氏殂十月劉虎寇西境王遣軍大破之虎死子務桓立始來歸順王妻以女七年二月遣大人長孫秩迎繼后慕容

容氏於和龍晃送女於境七月晃遣使來聘求交婚王
許之以烈帝女妻焉十四年王以中州紛梗將親率六
軍乘石氏之亂廓定中原諸大人諫乃止十八年太后
王氏殂十九年正月劉務桓死其弟關頭立潛謀反二
十一年關頭部人多叛懼而東走渡河半濟而水陷後
衆盡歸其兄子悉勿祈初關頭之叛悉勿祈兄弟十二
人在王左右盡遣之歸欲其自相猜離至是悉勿祈奪
其衆關頭窮而歸命王待之如初二十二年春王東巡

桑乾川四月悉勿祈死弟衛辰立二十三年六月王后
慕容氏殂七月衛辰來會葬因求婚許之二十五年王
南巡君子津

魏書載二十六年冬十月王討高車破之獲生口馬
牛羊百餘頭二十七年討沒歌部破之獲牛馬羊數
百萬頭

二十八年正月衛辰謀反度河東王討之衛辰懼遁走
三十年十月王征衛辰時河水未成王乃以葦絙約澌

俄冰合乃散輦於上水草相結若浮橋衆軍利涉衛辰
與宗族西走收其部落而還三十四年春長孫斤謀反
伏誅斤之反也拔及向衛坐太子寔格之傷脇五月葬
後道武稱帝追謚為獻明皇帝七月王孫珪生大赦三
十九年秦主苻堅遣其大司馬苻洛帥衆二十萬及其
將朱彤張蚝鄧羗等諸道來侵王師不利王時不豫乃
率國人避於陰山之北高車雜種盡叛四面寇掠不得
芻牧復度漠南堅軍稍退乃還十二月至雲中旬有二

日王子寔君作亂王遇弑殂時年五十七道武即位追
上廟號及謚王性寬厚時國少繒帛代人許謙盜絹二
疋守者以告王匿之謂燕鳳曰吾不忍視謙面卿勿洩
之謙或慙而自殺為財辱士非也嘗擊西部叛賊流失
中目賊破後諸大臣執射者各持錐刀欲屠割之王曰
各為其主何罪也釋之其仁恕若此

太祖道武皇帝

自北狄割據中原以來稱皇稱帝大書正史者從道

武始噫其孝文功哉

諱珪昭成帝嫡孫獻明帝子母曰獻明賀后初因遷徙
游於雲澤寢夢日出室內寤而見光自牖屬天歎然有
感以建國三十四年七月七日生太祖於參合陂北其
夜有光明昭成大悅羣臣稱慶大赦告於祖宗保者以
太祖體重倍於常兒竊謂奇怪明年有榆生於藏胞之
坎後遂成林太祖弱而能言目有光曜廣顙大耳六歲
而昭成殂秦王苻堅遣將內侮將遷太祖長安賴燕鳳

乃免堅軍既還國衆離散堅使劉庫仁劉衛辰分攝國
事南部大人長孫嵩及元他等盡將故人衆南依庫仁
太祖於是轉在獨孤部元年藏昭成於金陵營梓宮木
梯盡生成林太祖雖冲幼而巍然不羣劉庫仁嘗語其
子謂太祖有高天下之志必興復洪業七年十月晉敗
秦苻堅於淮南慕容文等殺劉庫仁弟眷代攝國部八
年慕容暉弟冲僭位是為西燕姚萇僭稱大單于萬年
秦王慕容垂僭稱燕王九年劉庫仁子顯殺眷而代之乃

將謀逆商人王霸知之履太祖足於衆中太祖乃馳還
是時故大人梁盆子六眷為顯謀主盡知其計密使部
人穆崇馳告太祖乃陰結舊臣長孫捷元他等因幸賀
蘭部其日顯果使人殺太祖不及語在獻明太后傳是
歲乞伏國仁私署秦河二州牧大單于後秦姚萇弑秦
王苻堅堅子丕僭即皇帝位於晉陽

登國元年春正月戊申太祖即代王位郊天建元大會
於牛川復以長孫嵩為南部大人以叔孫普落為北部

大人是月慕容垂僭即皇帝位於中山國號燕二月辛
定襄之盛樂息衆課農西燕慕容冲為其部下所殺夏
四月改稱魏王五月東幸陵石

魏書曰護佛侯部帥侯辰乙弗部帥代題叛走諸將
請追之帝曰侯辰等世脩職役宜忍其小過當今草
創人情不一愚近者固應爾不足怪也

秋七月還盛樂己酉代題復以部落來降旬有數日亡
奔劉顯王使其孫倍斤領部落後秦姚萇僭即皇帝位

於長安秋八月劉顯遣弟亢泥迎王叔窟咄于慕容永以兵隨之來逼南境王左右干桓等與諸部大人謀應之事洩誅造謀者五人餘悉不問王慮內難乃北踰陰山幸賀蘭部阻山為固遣行人安童長孫賀請師於慕容垂垂令其子賀麟率師隨同等軍未至而寇逼於是北部大人叔孫普洛等十三人及諸烏丸亡奔衛反王自弩山幸牛川屯于延水南出代谷會賀蘭於高柳大破窟咄悉收其衆冬十月秦苻丕為晉將馮該所殺西

燕慕容永僭即皇帝位於長子十一月秦苻登僭即皇帝位於隴東十二月後燕慕容垂遣使授王西單于印綬封上谷王王不納

是歲晉孝武帝太元十一年 愚按南史內皆書魏周隋紀年獨北史不書南北一體宜補後梁東魏北齊倣此

二年夏五月遣安同固請兵于慕容垂垂遣其子賀麟率衆來會六月王親征劉顯大破之顯奔慕容永盡收

其部落秋八月王至自伐顯冬十月幸濡源十一月遂幸赤城十二月巡松漠還幸牛川

三年春正月王東巡夏四月幸東赤城五月癸亥北征庫莫奚大破之

魏書曰獲其四部雜畜十餘萬渡弱落水班賞將士六月西秦乞伏國仁卒弟乾歸立私署河南王秋七月庫莫奚部帥鳩集遺散夜犯行宮縱騎撲討盡滅之其月王還赤城八月使九原公儀於後燕慕容垂冬十月

垂遣使來聘

愚按道武是時方屢請兵于垂以靖內難而除外寇
本史所云徵兵與垂朝貢皆誇誕之詞今易之
書曰二月癸巳帝西征至女水討解如部大破之獲
男女雜畜數十萬

四年春正月甲寅襲高車諸部落二月癸巳遂至水水
討赤突隣部竝大破之是月呂光自稱三河王夏四月
行還赤城五月使陳留公虔於後燕慕容垂冬十月垂

遣使來聘

五年春三月甲申西征至鹿渾海襲高車袁紇部大破之

魏書曰鹵獲生口馬牛二十餘萬

慕容垂遣子賀麟來會夏四月丙寅行幸意辛山與賀麟討賀蘭紇奚諸部落大破之秋八月還幸牛川使秦王觚於慕容垂九月壬申討叱奴部於囊曲河敗之冬十月討高車豆陳部於狼山破之十二月還次白漠

欽定四庫全書

六年春正月幸組埵川三月遣九原公儀陳留公虔等
西討黠弗部大破之夏四月祭天秋七七月壬申講武
於牛川行還組埵川後燕慕容永遣其大鴻臚慕容鈞奉書
絕之遣使於西燕慕容永永遣其大鴻臚慕容鈞奉書
勸進尊號

慕容永遣使勸進尊號有奉表字時永方稱帝與魏
為敵國此亦魏誕言今改書

九月王襲五原屠之收其積穀還組埵川於桐陽塞北

樹碑記功冬十月戊戌北征柔然

愚按柔然其本號北史呼為蠕蠕乃太武所改魏人主及臣下稱呼仍之餘皆改柔然從寔也

追破之於大磧南商山下十一月戊辰還幸紐埏川戊寅衛辰遣子直力鞬寇南部壬午王大破之於鐵岐山南

魏書曰獲其器械輜重牛羊二十餘萬

衛辰父子奔遼十二月滅之衛辰少子勃勃

愚按勃勃其本名北史所云屈子乃明元所改魏人主及臣下稱呼仍之它皆改勃勃從寔也晉書又以屈子為勃勃字更誤

亡奔薛于部車駕次於鹽池自河以南諸部悉平

魏書曰獲其珍寶畜產名馬三十餘萬匹牛羊四百餘萬頭班賜諸臣各有差

收衛辰子弟宗黨無少長五千餘人盡殺之

魏書靈徵志載是月帝獵親獲鹿一角召問羣臣皆

曰鹿二角今一是諸國將并之應

是歲起河南宮

七年春正月幸木根山遂次黑鹽池饗羣臣諸國貢使
北之美水三月還幸河南宮秋七月行幸漠南仍築巡
臺冬十二月西燕慕容永遣使來聘

八年春正月南巡二月幸羖羊原赴白樓三月車駕西
征侯呂部四月至苦水大破之五月還幸白樓夏六月
北巡秋七月臨幸新壇先是衛辰子勃勃奔薛于部徵

之不送八月王南征薛于部屠其城九月還幸河南宮
是年後秦姚萇卒

九年春三月北巡使東平公元儀屯田於河北五原至
於柰陽塞外夏五月田於河東秋七月還幸河南宮冬
十月蠕蠕社崙等率部落西走是歲後秦姚興僭立殺
秦主苻登後燕慕容垂滅西燕永

十年夏五月幸鹽池六月幸河南宮秋七月後燕慕容
垂遣其子寶來寇五原八月王親兵河南冬十月辛未

竇燒船夜遁己卯王進軍濟河乙酉夕至參合陂丙戌大破之

魏書曰獲其器甲輜重軍資雜財十餘萬計

擒其王公以下文武將吏數千人於俘鹵中擢其才識者賈彝賈潤晁崇等參謀議憲章故寔十二月還幸雲中之盛樂

皇始元年春正月大蒐於定襄因東幸善無北陂三月後燕慕容垂寇桑乾陳留公虔死之垂遂至平城西北

聞王將至

資治通鑑曰珪震怖欲走曰將至者必飾辭

乃築城自守疾甚歸卒于上谷子寶秘喪還至中山乃
僭立夏六月丁亥王太后賀氏殂是月葬獻明太后呂
光僭稱天王國號涼

魏書天象志曰是月有星彗於髦頭所以去穢布新
也先是有大黃星出于昴畢之分五十餘日燕太史
丞王先曰當有真人起於燕代大兵鏘鏘鋒不可當

幾帝建元立號天下莫敵

秋七月左司馬許謙上書勸進尊號於是改元始建天子旌旗出警入蹕八月己亥大舉攻後燕慕容寶王親勒六軍四十餘萬南出馬邑踰句注旌旗絡繹二千餘里鼓行而前人屋皆震別詔將軍封真等從東道襲幽州圍薊九月戊午次陽曲乘西山臨觀晉陽寶并州收遼西王農棄城遁并州平初建臺省置百官封拜公侯將軍刺史太守尚書郎以下悉用文人王初拓中原留

心慰納諸士大夫詣軍門者無少長皆引入人得盡言
苟有微能咸蒙叙用己未詔輔國將軍吳牧畧地晉川
獲慕容寶丹陽王買得等於平陶城九月晉孝武帝殂
冬十一月庚子朔王至真定自常山以東守宰或捐城
奔竄或稽顙軍門唯中山鄴信都三城不下別詔東平
公儀攻鄴冠軍將軍王建左軍將軍李栗等攻信都軍
所行不得傷桑棗戊午進軍中山己未圍之圭曰吾量
寶不能出戰必憑城自守急攻則傷士久守則費糧不

如先平鄴信都然後還取中山諸將稱善丁卯車駕幸
魯口城

二年春正月壬戌王引騎圍信都其夜寶冀州刺史宜
都王慕容鳳踰城奔中山癸亥寶輔國將軍張驤獲軍
將軍徐超舉城降是月南涼禿髮烏孤私署大單于西
平王二月丁丑王軍于鉅鹿之北肆塢臨滹池水其夜
寶悉衆犯營燎及行宮兵人駭散王驚起不及衣冠跣
出擊鼓俄而左右及中軍將士稍集王設奇陣列烽營

外縱騎衝之寶衆大敗走還中山獲其器械數十萬計
寶尚書閔亮秘書監崔逞等降者相屬賜拜職爵各有
差三月己酉車駕至盧奴寶求和請送秦王觚割常山
以西奉魏乞守中山以東王許之己而寶背約辛亥車
駕至中山命將圍之是夜寶弟賀麟將妻子走西山寶
恐賀麟先據和龍壬子夜北遁城內共立慕容普隣為
主夏四月王以軍糧不繼詔東平公儀罷鄴圍徙屯鉅
鹿五月庚子王以中山城內為普隣所脅詔喻之甲辰

曜兵揚威以示城內命諸軍罷圍南徙以待其變甲寅
以東平公儀為左丞相封衛王進襄城公題爵為王秋
七月普隣遣烏丸張驤率五千餘人出城求食寇靈壽
賀驤自丁零中入驤軍因其衆復入中山殺普隣而自
立八月丙寅朔王進軍九門時大疫人馬牛死者十五
六中山猶據守羣下咸思北還王知之謂曰斯固天命
將若何四海皆可與為國在吾所以撫之耳何恤乎無
人羣臣乃不敢言九月賀驤飢窮率三萬餘人寇新市

甲子晦王進軍討之太史令晁崇奏曰不吉王曰何也
對曰紂以甲子亡兵家忌之王曰武不以甲子勝乎
崇無以對冬十月丙寅王進軍新市賀麟退阻泝水依
漸洳澤以自固甲戌王臨其營戰於義臺陂大破之賀
麟單馬走鄴慕容德殺之甲申賀麟所署公卿尚書將
吏士卒降者二萬餘人其將張驤李沈慕容文等先來
降尋皆亡還是日復獲之皆赦不問獲其所傳皇帝璽
綬圖書府庫珍寶中山平乙酉襄城王題薨

是歲晉安帝隆安元年

天興元年春正月慕容德走保滑臺衛王儀剋鄴庚子
幸真定遂幸鄴民老病不能自存者詔郡縣賑卹之王
至鄴巡登臺榭徧覽宮城將有定都志乃置行臺遂還
中山所過存問百姓詔大軍所經州郡皆復資租一年
除山東民租賦之半車駕將北還發卒萬人通直道自
望都鐵山鑿恒嶺至代五百餘里王慮還後山東有變
乃於中山置行臺詔衛王儀鎮之使畧陽公遵鎮勃海

之合口右軍將軍尹國光督租冀州聞王將還謀反欲襲信都安南將軍長孫嵩執送斬之辛酉車駕發中山至望都堯山徙山東六州民吏及徙河高麗雜夷三十六萬百工伎巧十餘萬口以充京師車駕次于恒山之陽博陵渤海章武諸郡羣盜並起畧陽公遵等討平之是月南燕慕容德自稱燕王據固固二月車駕至自中山幸繁峙宮更選屯衛詔給內徙新戶耕牛計口授田三月徵左丞相衛王儀還京詔畧陽公遵代鎮中山夏

四月壬戌以歷陽公穆崇為太尉鉅鹿公長孫嵩為司徒進封畧陽公遵為常山王南安公順為毘陵王祭天於西郊旗幟有加廣平太守遼西公意列謀反與郡人韓奇矯假識圖將襲鄴城詔反者就郡賜死是月燕蘭汗弑其主慕容寶自立為大單于昌黎王六月丙子詔有司議定國號羣臣奏曰昔周秦以前帝王居所生之土及王天下即承為號今國家啓基雲代應以代為號詔曰昔朕遠祖總御幽都控制遐國雖踐王位未定九

州逮於朕躬掃平中土凶逆蕩除遐邇率服仍先號為魏

趙明誠金石錄曰魏自道武定號為魏後無復稱代事今魏碑數數有之蓋當時雖稱魏猶不廢始封故兼稱代耳即崔浩所云代魏兼稱猶彼殷商也

秋七月遷都平城始營宮室建宗廟立社稷燕慕容寶子盛討殺蘭汗自立為長樂王八月詔有司正封畿制郊甸端徑術樹道里平五權較五量定五度遣使巡行

郡國舉奏守宰不法者親覽察黜陟之冬十月起天文
殿十一月辛亥尚書吏部郎中鄧淵

本史稱彥海避唐高祖諱今正之餘倣此

典官制立爵品定律呂協音樂儀曹郎中董謚撰郊廟
社稷朝覲饗宴之儀三公郎中王德定律令申科禁太
史令晁崇造渾儀考天象吏部尚書崔宏總裁之閏月
左丞相衛王儀及王公卿士詣闕上書曰臣等聞宸極
居中則列宿齊其晷帝王順天則羣后仰其度伏惟陛

下德協二儀道隆三五仁風被於四海盛化塞於天區
澤及昆蟲恩霑行葦謳歌所屬八表歸心而躬履謙虛
退身後已宸儀未彰袞服未御非所以允皇天之意副
樂推之心臣等謹昧死以聞王三讓乃許之十二月己
丑皇帝即位于天文殿太尉司徒進璽綬百官咸稱萬
歲

魏書禮志載告天文曰皇帝臣珪敢用玄牡昭告於
皇天后土之靈上天降命乃眷我祖宗世王幽都珪

以不德思寧黎元龔行天罰殪劉顯屠衛辰平慕容
定中夏羣臣勸進謂宜正位居尊副天人望珪以天
時人謀不可久替謹命禮官擇吉日受皇帝璽綬惟
神祇其丕祚魏室永綏四方

大赦改元追尊成帝以下及后號謚樂用皇始之舞詔
百司議定行次尚書崔宏等奏從土德服色尚黃數用
五祖以未臘以辰犧牲用白五郊立氣宣贊時令敬授
民時行夏之正

資治通鑑曰命朝野皆束髮加帽

徙六州二十二郡守宰豪傑吏民二千家於代都
二年春正月甲子初祀上帝于南郊以始祖神元皇帝
配降壇視燎成禮而反乙丑赦京師始制三駕之法庚
午北巡分命諸將大襲高車常山王遵三軍從東道出
長川高涼王樂真等從西道出牛川車駕親勒六軍從
中道自駁髯水西北出二月丁亥朔諸軍同會破高車
雜種三十餘部

魏書曰獲七萬餘口馬三十餘萬匹牛羊百四十餘萬

衛王儀督三將別從西北絕漠千餘里破其遺迸七部
魏書曰獲三萬餘口馬五萬餘匹牛羊二十餘萬頭
還次牛川及薄山竝刻石紀功以所獲高車衆起鹿苑
于南臺陰北距長城東苞白登屬之西山廣輪四十里
鑿渠引武川水注之苑中疎為三溝分流宮城內外又
穿鴻鴈池三月己未車駕至自北伐甲子初令五經羣

書各置博士增國子太學生員三千人是月氏人李辯叛慕容德求援於鄴行臺尚書和跋跋以輕騎應之剋滑臺收德宮人府藏

魏書曰丙子遣建義將軍庾真等破侯莫陳部獲馬牛十餘萬頭

秋七月起天華殿辛酉大閱于鹿苑八月增啓京城十二門作西武庫除州郡民租賦之半辛亥詔禮官備撰衆儀著於新令范陽人盧溥聚衆海濱稱幽州刺史攻

掠郡縣殺幽州刺史封沓干是月南京禿髮烏孤卒其弟利鹿孤立遣使朝貢冬十月太廟成遷神元平文昭成獻明神主於太廟十二月

甲午慕容盛征鹵將軍燕郡太守高湖率戶三千內

屬

天華殿成涼呂光立其子紹為天王自稱太上皇及卒庶子纂殺紹自立

三年春正月戊午材官將軍和突破盧溥於遼西獲之

欽定四庫全書

及其子煥傳送京師輶之癸亥祀北郊分命諸官循行
州郡觀風俗察舉不法二月丁亥詔有司祀日於東郊
始耕籍田壬寅皇子聰薨三月戊午立皇后慕容氏是
月穿城南渠於城內作東西魚池夏四月秦姚興遣使
來聘五月戊辰詔謁者僕射張濟使於興己巳東巡遂
幸涿鹿遣使者以太牢祭帝堯帝舜廟西幸馬邑觀湟
源六月庚辰朔日有蝕之秋七月西秦王乞弗乾歸大
為秦姚興所破壬子車駕還宮起中天殿及雲母堂金

華室

魏書載十有二月乙未詔曰世俗謂漢高起於布衣而有天下此未達其故也夫劉承堯統曠世繼德有蛇龍之徵雲彩之應五緯上聚天人俱協明革命之主大運所鍾不可以非望求也然狂狡之徒所以顛蹶不已誠惑於逐鹿之說而迷於天命也故有踵覆車之轍蹈覆轍之蹤毒甚者傾州郡害微者敗邑里至乃身死名頽殃及九族從亂隨流死而不悔豈不

痛哉春秋之義大一統之美吳楚僭號久加誅絕君子賤其偽名比之塵垢自非繼聖載德天人合會帝王之業夫豈虛應有國有家者誠能推廢興有期審天命不易察徵應之潛授絕姦雄之僭肆則幾於神智矣如此禍悖無緣而生兵甲何因而起凡厥來世勗哉戒之

時太史屢奏天文錯亂帝親覽經占多云宜改王易政於是數革官號欲以防塞凶狡消弭災變已慮羣下疑

感冬十二月丙申下詔述成敗之理鑑殷周之失革秦漢之弊以喻臣下

魏書載詔曰上古之治尚德下名有任無爵易治而事序故邪謀不起周姬之末下凌上替以號自定以位制祿卿世其官大夫遂事陽德不暢議發家倍故繫起兵作秦漢之弊捨德崇侈能否混雜庶官失序任非其人於是忠義道寢廉恥節廢莫不由乎貴尚名位而禍敗及之矣古置三公職大憂重故曰待罪

宰相將委任責成非虛寵祿也而今世俗僉以台輔
為榮貴企慕而求之夫桀紂南面雖高可薄姬旦為
下雖卑可尊一官可以効智華門可以垂範苟以道
德為實賢於覆餗蔀家矣故量力者令終而義全昧
利者身陷而名滅利之與名毀譽之疵競道之與德
神識之家寶是故道義治之本名爵治之末名不本
於道不可為宜爵無補於時不可為用來者誠思成
敗之理察治亂之由鑑殷周之失草秦漢之弊則幾

于治矣

是歲李嵩私署秦涼二州牧涼公是為西涼

四年春二月丁亥命樂師入學習舞釋菜於先聖先師
丁酉分命使者巡行州郡聽察辭訟糾劾不法是月後
涼王呂光弟子隆弒呂纂而自立三月帝親漁薦於寢
廟

魏書靈徵志曰晉昌民賈相為鴈門郡吏入句注西
陁見一老父曰自今以後四十二年當有聖人出北

方時當大樂子孫永吉吾不及見之言終而過顧視之老父化為石人至帝破慕容寶之歲四十二年矣時新興太守上言其事

夏四月辛卯罷鄴行臺詔有司明揚隱逸五月起紫宸殿玄武樓涼風觀石池鹿苑臺六月盧水胡沮渠蒙遜私署涼州牧張掖公秋七月詔兗州刺史長孫肥南徇許昌彭武詔賜境內鎮戍將士布帛各有差八月後燕段興弒其主慕容盛其叔父熙盡誅段氏僭即皇帝位

冬十二月集博士儒生比衆經文字義類相從凡四萬
餘字號曰衆文經是歲李勣沮渠蒙遜並遣使朝貢
五年春正月帝聞秦主姚興將寇邊庚寅大簡興徒詔
并州諸軍積穀于平陽乾壁

魏書曰戊子材官將軍和突破黜弗索古延等諸部
獲馬三千餘匹牛羊七萬餘頭辛卯蠕蠕社崙遣騎
救素古延等和突逆擊破之于山南河曲獲鎧馬二
千餘匹班師賞賜將士各有差二月癸丑征西大將

軍常山王遵等至安定之高平破多蘭部帥木易于
率數千騎與衛辰屈丐棄國遁走追至隴西瓦亭不
及而止獲其輜重庫藏馬四萬餘匹駱駝牛三千
餘頭牛羊九萬餘口班賜將士各有差徙其民於京
師

三月南涼禿髮利鹿孤卒夏五月秦姚興遣其弟義陽
王平來侵平陽攻陷乾壁秋七月戊辰朔車駕西討八
月乙巳至乾壁平固守進軍圍之興悉舉其衆來救甲

子帝度蒙坑逆擊興軍大破之冬十月平赴水死俘其
衆三萬餘人獲興尚書左僕射狄伯支以下四品將軍
以上四十餘人獲前亡臣王次多靳勒並斬以徇興頻
使請和帝不許羣臣請進平蒲坂帝慮柔然為難戊申
班師十一月車駕次晉陽徵相州刺史庾岳為司空十
二月辛亥至自西征越勒莫弗率其部萬餘家內屬
六年春正月辛未朔方尉遲部別帥率萬家內屬入居
雲中夏四月癸巳朔日有蝕之五月大簡輿徒將畧江

淮秋七月鎮西大將軍司隸校尉毗陵王順有罪以王
還第戊子北巡築宮于豺山縱士校獵東北踰屬嶺出
參合代谷九月行幸南平城規度澤南面夏屋山背南
瓜堆將建新邑辛未車駕還宮冬十月起西昭陽殿乙
卯立皇子嗣為齊王加車騎大將軍位相國紹為清河
王加征南大將軍熙為陽平王曜為河南王封故秦愍
王子夔為豫章王陳留桓王子悅為朱提王丁巳晉人
來聘十一月庚午將軍伊謂大破高車十二月晉桓玄

廢其主司馬德宗為平固王而自立僭號楚

是歲晉元興元年

天賜元年春二月晉劉裕起兵誅桓玄三月初限縣戶不滿百罷之夏五月置山東諸治發州郡徒謫造兵甲

魏書官氏志曰是年八月初置六謁官準古六卿帝欲法古純質官號俱不依周漢舊名皆依遠古雲鳥之義諸官走使謂之鳬鴨取飛迅疾以伺察者為候官謂之白鷺取其延頸遠望餘官義皆類此咸有比

況

秋九月帝臨昭陽殿分置衆職引朝臣文武親自簡擢
量能叙用制爵四等曰王公侯子除伯男之號追錄舊
臣加封爵各有差是秋江南大亂流人襁負奔淮北者
行道相尋冬十月辛巳大赦改元築西宮十一月幸西
宮大選臣寮令各辯宗保舉才行行諸部子孫失業賜
爵者二千餘人

二年春正月晉主司馬德宗復位夏四月祀西郊車旗

盡黑

魏書天象志曰帝御大駕百官及賓國諸部大人畢從至郊所帝立青門內近南壇西內皇后及九宮從黑門入列於青門內近北並西面祀訖而返

冬十月南燕慕容德卒

是歲晉義熙元年

三年春正月甲申北巡幸豺山宮校獵還至屋孤山二月乙亥幸代園山建五石亭三月庚子車駕還宮夏四

欽定四庫全書

月庚申復幸豺山宮占授著作郎王宜弟造兵法孤虛
立成圖三百六十時遂登定襄角史山又幸馬城甲戌
車駕還宮六月發八百里五百里內男丁築湟南宮門
闕高十餘丈引溝穿池廣苑囿規立外城方二十里分
置市里經途洞達三十日罷秋七月太尉穆崇卒八月
甲辰行幸豺山宮遂至青牛山丙辰西登武要北原觀
九十九泉造石亭遂之石漠九月甲戌朔幸漠南鹽池
壬午之漠中觀天鹽池度漠北之吐鹽池癸巳南還長

川丙申臨觀長陂冬十月庚申車駕還宮

四年春二月封皇子脩為河間王處文為長樂王連為
廣平王黎為京兆王夏五月北巡自參合陂東過蟠羊
山大雨暴水流輜車數百乘殺數百人遂東北踰石漠
至長川幸濡源常山王遵有罪賜死六月赫連勃勃自
稱大單于大夏天王秋七月西幸參合陂築北宮垣三
旬而罷乃還宮後燕慕容寶養子高雲殺其主慕容熙
而自立僭號天王八月誅司空庾岳

五年春正月行幸豺山宮遂如參合陂觀魚于延水至
寧川三月秦姚興遣使來聘秋七月戊戌朔日有食之
冬十月禿髮傉檀僭即涼王位

六年夏帝不豫初帝服寒食散自太醫令陰羗死後藥
數動發至此愈甚而災危屢見憂懣不安或數日不食
或不寢達旦歸咎羣下喜怒乖常謂百寮左右不可信
慮如天文之占或有肘腋之虞追思既往成敗得失終
日竟夜獨語不止若傍有鬼物對揚者朝臣至前追其

舊惡便見殺害餘或顏色變動或喘息不調或行步乖
節或言詞失措帝謂懷惡在心變見于外乃手自毆擊
死者皆陳天安殿前於是朝野人情各懷危懼有司廢
怠莫相督攝百工偷劫盜賊公行里巷間人為稀少帝
亦聞之曰朕故縱使然幸過災年當更清整之耳

魏書天象志曰六年四月雷震天安殿東帝惡之命
左校以衝車攻殿東西兩序屋毀之帝竟暴崩

秋七月慕容氏支屬百餘家謀欲外奔發覺伏誅死者

三百餘人八月衛王儀謀叛賜死十月戊辰清河王紹弒帝帝崩於天安殿時年三十九永興二年九月甲寅上謚曰宣武皇帝葬盛樂金陵廟號太祖泰常五年改謚道武

魏書刑罰志曰太祖初歷艱難備嘗險阻知民情偽及在位躬行仁厚既定中原患前代刑網峻密乃除其苛法約定科禁大崇簡易是時民久苦兵亂畏法樂安帝知其如此鎮之以靜罰必從輕兆庶咸戴然

於大臣持法不捨季年災異頻見聖體不豫刑罰頗
酷濫 愚按宋人進魏書表云道武太武暴戾甚於
聽虎若果如言何以有國若斯之長讀此方知宋人
言偏

太宗明元皇帝諱嗣道武皇帝長子母曰劉貴人登國
七年生於雲中宮道武晚有男大悅乃大赦太宗明睿
寬敏非禮不動天興六年封齊王拜相國初王母既賜
死道武召告曰昔漢武將立其子而殺其母不令婦人

與國政汝當繼統故吾遠同漢武王素純孝哀不自勝
道武怒王還宮哀不自止道武知而又召王王欲入左
右恐道武怒盛入或不測諫止之請待和解而進王從
之乃遊行逝于外及元紹弒逆王還而誅之

永興元年冬十月壬午皇帝即位大赦改元追尊皇妣
為宣穆皇后公卿大臣先罷歸第者悉登用之詔南平
公長孫嵩北新侯安同對理民訟簡賢任能是月馮跋
弒其主高雲僭號天王是為北燕

按晉書及本史雲傳皆言為寵臣離班桃仁所弑此
歸罪於跋必有所見

閏十月丁亥朱提王悅謀反賜死詔都兵將軍山陽侯
奚斤巡諸州問民疾苦十二月戊戌封衛王儀子良為
南陽王進陰平公列爵為王改封高涼王樂真為平陽
王己亥帝始居西宮御天文殿柔然犯塞是歲乞伏乾
歸始稱秦王是為西秦

二年春正月甲寅朔詔南平公長孫嵩等北征柔然因

留屯漠南夏五月嵩等自大漠還柔然追圍之於牛川
壬申帝北伐柔然聞而遁走車駕還幸參合陂六月晉
劉裕滅南燕慕容超秋七月丁巳立射臺于陂西仍講
武乙丑至自北伐

三年春二月戊戌詔簡宮人非御及伎巧者悉以賜鰥
民

魏書載詔曰衣食足知榮辱夫人飢寒切已唯恐朝
夕不濟所急者溫飽而已何暇及仁義之事乎王教

多違蓋由於此非夫耕婦織內外相成何以家給人足乎其簡宮人非所當御及執作伎巧其餘悉出以配鰥民

己亥詔北新侯安同等持節巡行并定二州及諸山居雜胡丁零問其疾苦察舉守宰不法者辛丑簡宮女工伎之不急者出賜人不能自存者三月乙未詔侍臣常佩劍夏五月丙寅復出宮女賜鰥人辛卯車駕謁金陵於盛樂己巳昌黎王慕容伯兒謀反伏誅六月秦姚興

遣使來聘秋七月戊申賜衛士酺三日冬十一月丁未
大閱於東郊

魏書載十二月甲午詔南平公長孫嵩任城公稽拔
白馬公崔玄伯坐朝堂錄決囚徒務在平當

四年春二月癸未登虎園射猛虎夏四月乙未宴羣臣
於西宮使各獻直言勿有所諱六月西秦乞伏乾歸為
兄子公府所弑閏月丙辰大閱于東郊秋七月己巳朔
東巡置四廂大將又放十二時置十二小將以山陽侯

奚斤元城公屈行左右丞相己卯大獮于石會山戊子
臨去畿陂觀魚庚寅至于濡源西巡幸北部諸落八月
壬子幸西宮臨板殿大饗羣臣命百姓大酺二日乙卯
賜王公以下至宿衛將士布各有差冬十一月乙丑賜
宗室近屬南陽王良以下至於總麻親布各有差是月
沮渠蒙遜僭稱西河王十二月丁巳北遼至長城而旋
五年春正月己巳大閱畿內男年十二以上悉集己卯
幸西宮頓拔大渠帥四十餘人詣闕奉貢賜以繒帛錦

眉各有差乙酉詔諸州六十戶出戎馬一匹庚寅大閱
于東郊署將帥以山陽侯奚斤為前軍衆三萬陽平王
熙等十二將各一萬騎帝臨白登躬自校覽二月庚戌
幸高柳川癸丑穿魚池于北苑庚午秦姚興遣使來聘
己卯詔使者巡行天下招延雋彥搜揚隱逸夏四月乙
卯西巡五月乙亥行幸雲中舊宮之大室丙子大赦六
月西幸五原校獵于骨羅山獲獸十萬秋七月己巳還
幸薄山帝登山觀宣武遊幸刻石頌德之處乃於其旁

起石壇薦饗賜從者大酺于山下前軍奚斤等破越勒
泥部落於跋那山西

魏書曰獲馬五萬匹牛二十萬頭

徙二十萬餘家而還丙戌車駕自大室西南巡諸部落
遂南次定襄大洛城東踰七嶺山田於善無川八月癸
卯車駕還宮癸丑奚斤等班師甲寅白登山觀降人數
軍實置新人于大寧給農器計口授田丁丑幸豺山宮
癸未還宮冬十一月癸酉大饗於西宮秦姚興遣使來

聘請進女許之

據晉書興傳則魏自求婚非興進女當以晉書為正
神瑞元年春正月辛酉以禎瑞頻集大赦改元辛巳行
幸繁峙賜王公以下至于士卒百工布帛各有差二月
戊戌車駕還宮六月西秦乞伏熾盤滅南凉禿髮傉檀
戊申幸豺山宮丁亥還宮秋七月晉將朱齡石滅蜀八
月戊子詔馬邑侯元陋孫使於秦姚興遣使來聘九
月丁巳朔日有蝕之冬十一月壬午詔使者巡行諸州

校閱守宰資財非自家所齎悉簿為賦守宰不如法聽
百姓詣闕告之十二月丙戌朔柔然犯塞丙申車駕北
伐

二年春正月丙辰車駕至自北伐二月丁亥大饗於西
宮甲辰立宣武廟於白登西三月丁丑詔以刺史守宰
率多逋情今年資調懸違者謫出家財以充不聽徵發
於人夏四月晉人來聘己卯北巡五月丁亥次於參合
東幸大寧下未田於四岬山六月戊午臨去畿陂觀魚

辛酉次于濡源立蟀臺遂射白熊於顏牛山獲之丁卯
幸赤城親見長老問民疾苦復租一年南次石亭幸上
谷問百年訪賢雋復田租之半壬申幸涿鹿登嶠山觀
溫泉使以太牢祠黃帝唐堯廟癸酉幸廣寧己卯登廣
寧之厯山以大牢祠舜廟帝親加禮庚辰幸代秋七月
癸未車駕還宮復所過田租之半八月庚辰晦日有蝕
之九月京師民飢聽就食山東冬十月壬子秦姚興使
送其西平公主至帝以后禮納之辛酉行幸沮洳城癸

亥還宮丙寅詔以頻遇霜旱年穀不登命出布帛倉穀以賑貧窮十有一月丁亥幸豺山宮庚子還宮

泰常元年春正月甲申幸豺山宮戊子還宮二月丁未秦主姚興卒三月己丑長樂王處文薨夏四月壬子大赦改元庚申河間王脩薨五月甲申彗星二見六月丁巳北巡秋七月甲申大獵于牛川登釜山臨殷繁水南觀於九十九泉戊戌還宮辛亥晦日有食之九月晉劉裕溯河伐秦姚泓遣部將王仲德從陸道至梁城兗州

刺史尉建畏懦棄守北度仲德遂入滑臺詔將軍叔孫建等度河曜威斬尉建於城下冬十月幸豺山宮十一月甲戌還宮戊寅起蓬臺於北苑十二月南陽王良薨二年春正月甲戌朔日有蝕之二月丙午詔使者巡行境內觀風俗問其所苦

魏書載詔曰九州之民隔遠京邑時有壅滯守宰至不以聞今作方輿或有貧窮失農務者其遣使者巡行天下省諸州觀民風俗問民疾苦察守宰治行諸

不能自申皆因以聞

是月西涼公李暠卒夏四月丁巳幸高柳壬戌還宮五月西巡至雲中遂濟河田於大漠秋七月乙亥還宮乙酉起白臺於城南高二十丈是月晉劉裕減秦姚泓冬十月癸丑豫章王夔薨

魏書載十一月癸丑復諸州租稅

十二月己酉詔河東河內購姚泓子弟播越民間者庚申田於西山壬申幸大甯長川

三年

魏書載春正月丁酉朔帝至自長川

春三月晉人來聘庚戌幸西宮以渤海范陽郡去年水復其租稅夏四月己巳徙冀定幽三州徙何以京師五月壬子東巡至濡源及甘松遣征東將軍長孫道生等帥師襲馮跋帝自突門嶺待之道生至龍城徙其居民萬餘家而還秋七月戊午車駕至京師八月鴈門河內大雨復其租稅

魏書禮志曰是月帝薦熟於太祖白登廟有車騎聲
從北門入殷殷輶輶震動門闕執事者皆肅慄人以
為興隆之兆

冬十月戊辰築宮於西苑十一月赫連勃勃剋長安十
二月晉安帝殂

四年春正月壬辰朔車駕臨河大蒐于犢渚癸卯還宮
三月夏赫連勃勃僭即皇帝位癸丑築宮於蓬臺北夏
四月庚辰享東廟遠藩助祭者數百國辛巳南巡幸鴈

門賜所過無出今年租賦五月庚寅朔觀漁于澠水己亥還宮復所過一年租賦秋八月辛未東巡遣使祠恒岳甲申還宮賜所過無出今年田租九月甲寅築宮於白登山冬十一月丁亥朔日有蝕之十二月癸亥西巡至雲中踰白道北獵野馬於辱孤山至於黃河從君子津西度大狩於薛林山

是歲晉恭帝元熙元年

五年春正月丙戌朔自薛林東還至屋竇城饗勞將士

大酺二日班禽以賜之己亥還宮三月丙戌南陽王意
文薨夏四月丙寅起濯南宮五月乙酉詔曰宣武皇帝
體得一之玄遠應自然之冲妙大行大名未盡盛美今
啓緯圖始覩尊號其更上尊號曰道武皇帝以章靈命
之先啓聖德之玄同庚戌淮南侯司馬國璠池陽司馬
道賜等謀反伏誅六月丙寅幸翳犢山是月晉恭帝禪
位于宋秋七月丁酉西至五原丁未幸雲中太室賜從
者大酺八月癸亥還宮閏月甲午陰平王烈薨是歲西

涼李歆為北涼沮渠蒙遜所殺其弟恂復自立於敦煌
是歲宋武帝永初元年

六年春正月幸公陽二月己亥詔境內二十戶輸戎馬
一匹大牛一頭三月甲子陽平王熙薨乙亥制六部人
羊滿百口者調戎馬一匹發京師六千餘人築苑起自
舊苑東苞白登周回四十餘里是月沮渠蒙遜攻破敦
煌李恂自殺遂滅西涼夏六月乙酉北巡至蟠羊山秋
七月乙卯還宮癸酉西巡獵祚山親射猛虎獲之遂至

於河八月庚子大獮於瀆渚九月庚戌還宮壬申宋人來聘冬十月己亥行幸代十二月丙申西巡雲中

七年春正月甲辰朔自雲中西幸屋寶城賜從者大酺三日二月丙戌還宮三月乙丑河南王曜薨夏四月甲戌封皇子燾為太平王拜相國加大將軍丕為樂平王加車騎大將軍彌為安定王加衛大將軍範為樂安王加中軍大將軍健為永昌王加撫軍大將軍崇為建寧王加輔國大將軍俊為新興王加鎮軍大將軍獻懷長

公主子嵇敬為長樂王拜大司馬大將軍初帝服寒食
散頻年發動不堪萬幾五月立太平王燾為皇太子臨
朝聽政是月宋武帝殂秋九月詔司空奚斤等帥師伐
宋乙巳幸溫南宮遂如廣寧己酉詔皇太子率百國以
法駕田於東苑車乘服物皆以乘輿之副辛亥築平城
外郭周回三十二里辛酉幸嶠山遣使者祠黃帝唐堯
廟因東幸幽州見耆年問其所苦賜以爵號分遣使者
巡行州郡觀察風俗冬十月甲戌車駕還宮復所過田

租之半奚斤等濟河攻滑志不拔求濟師帝怒不許議
親南征為其聲援壬辰出自天門關踰恒嶺四方藩附
大人各帥所部從者五萬餘人十一月皇太子親統六
軍至塞上安定王彌與北新公安同居守丙午曲赦司
州殊死以下丙辰次於中山問民疾苦十二月丙戌行
幸冀州存問民俗遣壽光侯叔孺達等率衆自平原東
度徇下青兗諸郡

八年春正月丙辰行幸鄴存問民俗司空奚斤既平兗

豫還圍虎牢宋守將毛德祖距守不下柔然犯塞二月
戊辰築長城於長川之南起自赤城西至五原延袤二
千餘里備置戍衛三月乙卯濟自靈昌夏四月丁卯幸
成臯觀虎牢城內乏水懸縋汲河帝令連艦上施轆轤
絕其汲路又穿地道以奪其井丁丑幸洛陽觀石經閏
月丁未還幸河內北登太行幸高都已未虎牢潰士衆
大疫死者十二三辛酉幸晉陽班賜王公已下至於厮
役五月丙寅還次鴈門皇太子率百官以從八月幸馬

邑觀於澠源九月乙亥還宮冬十月癸卯廣西宮起外
牆周回二十里是歲飢詔所在開倉賑給十一月己巳
帝崩於西宮時年三十二遺詔以司宮異斤所獲軍寶
賜大臣自司徒長孫嵩以下至士卒各有差十二月庚
子上謚曰明元皇帝葬雲中金陵廟稱太宗帝兼資文
武禮愛儒生好覽史傳以劉向所撰新序說苑於經典
正義多有所闕乃撰新集三十篇採諸經史該洽古義
云

是歲宋少主義符景平元年

論曰自古帝王之興誠有天命亦賴累功積德方契靈
心有魏奄宅幽方代為君長神元生自天女桓穆勤於
晉室冥符人事夫豈徒然昭成以雄傑之姿苞君人之
量征伐四剋威被遐荒乃改都立號恢隆大業終百六
十歲光宅區中其原固有由矣道武顯晦安危之中屈
伸潛躍之際驅率遺黎奮其靈武克翦方難遂啓中原
垂拱人神顯登皇極雖冠履不暇棲遑外土而制作經

謨咸出長久所謂大人利見百姓與能抑不世神武也而屯厄有期禍生非慮將人事不足豈天實為之乎明元承運之初屬廓定之始于時狼顧鴟跼猶有窺覲加以天賜之末內難尤其甚帝孝心睿畧權正兼運纂業固基內和外撫終能周鄭款服聲教南被祖功宗德其義良已遠矣

愚按魏自道武至西魏恭帝共一百七十一年此云百六十載者止因魏收魏書以東魏紀年耳先有道

武稱代王之登國十年亦未入今并補入

南北史合注卷八十七